

甘肅全省新通志

卷伍拾伍

甘肅新通志卷之五十五

大吏傳

望隆碩輔職任封疆數十年安危繫焉其有揆文奮武功在社稷威震華戎者勳名當與河山並壽若夫旬宣是寄風憲攸司作生佛萬家頌福星一路時代雖易姓字猶芳今自周秦漢迄

國朝凡在西土高秉節鉞以及榮膺繡衣有聲當時足法後世者列爲大吏傳流風遺澤尙論之餘猶堪想見云

周南 仲周之卿土城朔方伐西戎語在小雅

秦蒙 恬世爲秦將秦并天下使將三十萬眾北逐戎狄收河南地築長城臨洮至遼東延袤萬餘里於是蒙氏威震匈奴

漢鄼 商高陽人陳勝起兵商聚少年得數千人屬沛公於岐沛公爲漢王賜商爵信成君以將軍爲隴西都尉別定北地郡破章邯

甘肅新通志

卷五十五

職官志 大吏傳上

一

別將於烏氏枸邑泥陽後積功遷至右丞相封曲周侯

靳 歙以中涓從沛公定三秦別西擊章平軍於隴西破之定隴西六縣

袁 盎字絲安陵人文帝時爲郎中以數直諫不得久居中調隴西都尉仁愛士卒眾皆爭爲之死

衛 青字仲卿平陽人元光六年以車騎將軍擊匈奴出上谷至龍城斬首虜數百元朔二年復取河南地爲朔方郡封長平侯匈奴憤甚數寇朔方上郡三年上令青將三萬騎出高闕禦之大捷獲其裨王十餘人及人畜無算凱旋至塞天子使使者持大將軍印卽軍中拜青大將軍諸將皆以兵屬益封青六千戶

張 騫漢中人武帝元朔三年以大中大夫奉使出隴西經匈奴單于留十餘年得閒西走歷大宛康居大月氏備悉其地肥饒歸

具言西域諸國風物產元狩元年復遣至西域次年匈奴渾邪王降漢元鼎六年分酒泉武威地置張掖敦煌爲河西四郡隸涼州部皆其功也

霍去病大將軍青姊子也善騎射從大將軍擊匈奴多所斬獲封冠軍侯元狩三年以驃騎將軍將萬騎出隴西踰烏盩涉狐奴轉戰六日過焉支山千餘里合短兵塵皋蘭下殺折蘭王斬盧侯王執渾邪王子及相國都尉首虜八千九百六十級收休屠祭天金人益封二千二百戶其夏復出北地深入二千里過居延攻祁連山得首虜三萬級益封五千四百戶日親貴比大將軍其秋渾邪王與休屠王謀降漢旣渾邪王有異志去病馳兵殺休屠王並降其眾四萬遣渾邪詣行在所由是滅隴西北地上郡戍卒之半明年復以五萬騎出塞約輕齎絕大幕獲其大燾及其主帥將軍以

甘肅新通志

卷五十五

職官志 大吏傳上

一一

下八十餘人封狼居胥山益封五千八百戶卒諡景桓

趙破奴太原人時漢通西域而樓蘭姑師小國當孔道攻漢使匈奴又出奇兵邀之於是遣從票侯破奴將屬國騎及郡兵數萬擊胡胡皆走遂破姑師虜樓蘭王酒泉列亭障至玉門大宛諸國以條支大鳥卵如二石甕及釐斬善幻人能吞刀吐火植瓜種樹屠人截馬之術來獻云後改封浞野侯

李 息北地郁郅人武帝元鼎間爲將軍西域旣通置河西郡後先零羌封養牢姐與匈奴通合兵十餘萬共圍枹罕息與郎申令徐自爲將兵十萬人擊平之始置護羌校尉持節統領焉

李廣利以貳師將軍伐宛出敦煌先置居延休屠二部都尉以衛酒泉至輪臺不肯下攻屠之自此平行至宛圍攻四十餘日宛貴人殺王母寡以降獻宛馬三千餘匹又憑漢使自擇汗血善馬數

十匹號爲天馬因以出烏孫者號西極馬又令搜粟都尉上官桀攻破郁城斬其王貳師東還諸所過小國聞宛破皆遣子弟從入貢獻因爲質焉封海西侯

常 惠太原人隨蘇武使匈奴後匈奴發騎由車師共侵烏孫於是漢大發兵五將軍分道出以惠爲校尉持節護烏孫五萬騎從西方入至右谷蠡庭獲單于父行及嫂居次名王騎將以上三萬九千人得馬牛驢羸橐駝五萬餘匹羊六十餘萬隻天子以惠奉使有功封長羅侯後龜茲殺校尉賴丹惠發西國兵討之責王殺漢使狀王縛貴人姑翼以獻惠斬之而還代蘇武爲典屬國又代趙充國爲右將軍卒諡壯武

蘇 武字子卿杜陵人建之子天漢元年出使匈奴單于欲降之武不屈乃幽置大窖中絕其飲食武齧雪與旃旆數日不死復徙

甘肅新通志

卷五十五

職官志 大吏傳上

三

置海上使牧羝武掘野鼠食草根卧起持漢節旄盡落終不降歷十九年始歸拜爲典屬國後宣帝思其功圖像麒麟閣

路博德西河平州人以右北平太守從驃騎有功爲強弩都尉封邳離侯太初三年以都尉屯居延築遮虜障敵不敢犯

鄭 吉會稽人宣帝時將兵破車師降日逐威震西域遂以吉爲西域都護中西域立幕府治烏壘城都察烏孫康居等三十六國漢之號令始頒西域矣

馮奉世字子明扶風人初學春秋通大義善兵法永光二年以右將軍擊隴西叛羌初議者謂民方收斂不宜多發兵奉世曰羌久輕邊吏相扇而起少發師而曠日與一舉而疾決利害相萬也爭之弗得後兩校尉果以兵少敗沒迺詔發六萬人益奉世遂大破羌虜斬首數千餘皆走出塞詔罷吏士留屯田備要處賜奉世爵

關內侯

任千秋永光二年爲奮武將軍助奉世討羌平之

陳 湯字子公瑕邱人好書善屬文沈勇多謀喜奇功建昭三年爲西域副都尉時鄧支單于恃其國大屢困辱漢使天子憂之湯與都護甘延壽矯制發兵奮勇入其城斬單于首及名王以下得漢使節二於是西域諸國靡不懼服論功封關內侯

杜 鄴字子夏茂陵人哀帝初遷涼州刺史居職寬舒吏民懷之竇 融字周公平陵人建武七年行大將軍涼州牧初融旣通漢使屢說隗囂歸命中朝囂不能從及帝自將征囂次高平第一融率五郡太守及羌氏等步騎數萬與大軍會帝高其功封安豐侯馬 援字文淵茂陵人王莽末避居涼州隗囂甚敬重之與決籌策使援往覘蜀反曰子陽井底蛙耳不如專意東方及使奉書洛

甘肅新通志

卷五十五

職官志 大吏傳上

四

陽見帝簡易闊達以爲帝王自有真也及還帝使與來歙持節俱西援說囂遣子入質因歸洛陽囂後復狐疑援數以書責之囂怨援遂拒漢帝西征召援問計援於帝前聚米爲山谷指畫形勢及眾軍所從道徑帝曰虜在吾目中矣進兵大破之拜大中大夫副來歙監諸將平涼州羌寇邊拜援隴西太守擊破先零奏置長史繕城郭起塢堠開溝渠勸耕牧一郡樂業塞外諸羌皆來附封新息侯

來 歙字君叔新野人建武初中原甫定而隴蜀未平帝憂之命歙往說囂囂遂遣子入侍拜歙中郎將帝謀收囂兵與俱伐蜀使歙喻旨囂遲疑不決歙怒杖節去八年率精兵二千人從回中襲略陽斬囂守將保其城囂悉兵數萬攻之帝大發兵上隴囂眾潰走詔歙率諸將入天水擊破公孫述將囂支黨及天水屬縣皆降

時饑流相望乃傾倉廩轉運諸縣以賑贍之於是隴右平而涼州亦通

馬 成字君遷南陽棘陽人世祖討河北以期門從征伐及卽位拜揚武將軍七年封平野侯八年從征破隗囂以成爲天水太守將軍如故九年代來歙守中郎將率武威將軍劉尙等破河池遂平武都

馮 異字公孫潁川人通左氏春秋孫子兵法從光武起兵諸將論功異獨屏樹下軍中號爲大樹將軍建武六年諸將爲隗囂所破敗詔異軍柁邑囂乘勝遣將王元行巡取柁邑異先據之閉城偃旗鼓元率眾馳赴異建旗鼓疾擊之巡軍驚亂遂大破之北地諸豪長悉降公孫述遣將趙匡救隗純異攻匡等皆斬之於是北地上郡安定皆降

甘肅新通志

卷五十五

職官志 大吏傳上

五

溫 序字次房太原祁人建武六年拜謁者遷護羌校尉序行部至襄武爲囂將苟宇所劫序曰受國重任義不貪生宇等曉譬之序大怒叱宇因以節撻殺數人賊眾爭欲殺之宇止之曰此義士死節可授以劍序受劍銜鬚於口顧左右曰旣爲賊所迫殺毋令鬚汚土伏劍而死帝悼之賜冢葬焉除三子爲郎

寇 恂字子翼昌平人初隗囂將高峻旣降復叛據高平堅守帝使耿弇圍之一歲不拔帝欲親征恂諫止之遂奉璽書至第一城峻遣軍師皇甫文出謁辭禮不屈恂斬之遣其副歸峻懼卽日出降諸將皆賀曰敢問殺其使而降其城何也恂曰皇甫文峻之心腹其所取計者也今來而不屈必無降心全之則文得其計殺之則峻喪其膽是以降耳

耿 弇字伯昭茂陵人光武卽位拜建威大將軍建武八年從上

隴與中郎將來歙分部徇安定北地諸營堡皆下之封好時侯馬 武字子張南陽湖陽人光武時封揚虛侯顯宗初燒當羌反寇隴西太守劉盱禦之敗諸羌皆叛拜武捕虜將軍討平之班 超字仲升扶風人家貧爲官傭書嘗投筆歎曰大丈夫當效傅介子張騫立功異域安能久事筆硯間哉後詣相者相者異其狀曰燕頷虎頭飛而食肉此萬里侯相也永平十六年從 固擊匈奴有功遣與從事郭恂使西域至鄯善以三十六人攻匈奴使館殺使者及其眾百餘人鄯善震怖遂納子入質西域諸國皆懷畏內屬封定遠侯

耿 恭字伯宗弇子永平十七年恭以司馬爲戊己校尉屯後王部金蒲城恭至部示漢威德昆彌遣子入侍明年北單于擊殺車師後王安得遂攻恭恭以毒藥傅矢語匈奴曰漢家箭神其中瘡

者必有異寇中矢者視瘡皆沸遂大驚會暴風雨隨雨擊之殺傷甚眾匈奴震怖相謂漢兵神速乃解去恭引兵據疏勒城匈奴復來攻壅絕澗水恭於城中穿井向井拜禱有頃水泉奔出乃令揚水示虜遂引去十一月車師叛復與匈奴共圍之恭率勵士眾禦之數月食盡煮鎧弩食其筋革與士卒推誠同生死故皆無二心初關寵上書求救乃詔酒泉太守段彭等將兵救之章帝建初元年擊車師匈奴走車師復降軍吏范羌固請迎恭歸拜騎都尉竇 固字孟孫平陵人永平十五年以固嘗從其父融在河西明習邊事乃以固爲奉車都尉同駙馬都尉耿秉將兵屯涼州十六年分道出擊羌夷固與耿忠率張掖酒泉敦煌甲卒及盧水羌人出酒泉塞至天山擊呼衍王斬首千餘級追至蒲類海取伊吾盧地置宜禾都尉留吏士屯田十七年復與耿秉及騎都尉劉張擊

車師降之復置西域都護戊己校尉

馬 防字江平援子章帝建初二年金城隴西保塞羌皆反防由中郎將拜行車騎將軍以長水校尉耿恭副擊之軍到塞會羌豪布橋等圍南部都尉於臨洮防欲救之臨洮地險車騎方駕乃別使兩司馬將數百騎分爲前後軍去臨洮十餘里爲大營多樹幡幟揚言大兵旦當進羌虜驚走因追擊破之斬首虜四千餘遂解臨洮圍防結以恩信燒當種皆降復引兵破布橋於索西布橋迫急將種人萬餘降

鄧 訓字平叔新野人禹之子和帝永元元年以張掖太守爲護羌校尉代張紆討叛羌稍以賞賂離間諸部會燒當以萬騎脅月氏胡訓開其城悉納其妻子諸胡相謂漢家常欲鬪我今使君被我以恩信眞吾父母也咸叩頭請効力訓收其勇銳爲義從羌胡

甘肅新通志

卷五十五

職官志 大吏傳上

七

數有功威信大行

貫 友永元五年爲護羌校尉以迷唐難以德服乃遣 搆離諸種因其解散遂攻迷唐於大小榆谷獲首虜八百餘人迷唐乃率部落遠徙

侯 霸先爲金城太守永元十三年迷唐復犯塞與護羌校尉周鮪合兵與戰鮪還營自守霸陷陣斬首四百餘級降六千餘口迷唐遂弱明年代鮪爲校尉

曹 鳳和帝中爲金城西部都尉初爲榆麋相時安定降羌燒何種反郡兵擊滅之自是迷唐衰弱西海郡縣小榆谷無復羌患鳳上言宜於此時建復西海郡縣規固二榆廣設屯田隔塞羌胡交關之路植穀富邊可以無西方之憂帝從之拜鳳爲都尉將徙士屯龍支

龐參字仲達河南緱氏人舉孝廉拜左校令坐法輪作永初元年涼州先零種羌反畔參於徒中上書言兵事會御史中丞樊準亦上書薦參太后納其言卽擢參於徒中召拜謁者使西督三輔諸軍屯四年拜漢陽太守郡人任棠者有奇節隱居教授參到先候之棠不與言但以薤一大本水一盂置戶屏前自抱兒孫伏於戶下主簿白以爲倨參思其微意良久曰棠是欲曉太守也水者欲吾清也拔大本薤者欲吾擊強宗也抱兒當戶欲吾開門恤孤也於是歎息而還參在職果能抑強助弱以惠政得民元初元年遷護羌校尉畔羌懷其恩信明年燒當羌種號多等皆降餘詳本傳

耿种扶風茂陵人美陽侯秉之子也嗣父侯爵安帝時爲漢陽太守能懷輯西羌延平元年冬麻奴等將種眾三千餘戶諸降

甘肅新通志

卷五十五

職官志 大吏傳上

八

馬賢史失其字籍安帝元初元年代龐參領校尉事四年與任尙會兵擊狼莫大戰破之狼莫走死永甯元年擊上郡叛羌斬首千八百級餘悉降時當煎種大豪饑五等以賢兵在張掖乘虛寇金城賢還軍擊之斬首數千及其大豪盧忽忽黨忍良亡出塞璽書封賢安亭侯忍良黨復結脅諸羌攻金城寇武威賢追至鸞鳥招降數千永建元年隴西鍾羌反賢擊之戰臨洮斬首千餘降其眾進封都鄉侯陽嘉二年鍾羌復叛詔拜賢爲謁者擊之降其眾十餘萬永和元年代馬續爲校尉擊武都諸叛羌斬其渠帥於是隴右復平四年徵爲宏農太守五年諸羌以刺史虐俱反復拜賢征西將軍屯漢陽羌寇武都賢將騎兵數千赴之至射姑山軍敗賢及二子皆戰死帝愍之賜卹封其孫光爲舞陽亭侯

衛瑶甘州府志作瑀建康元年領護羌校尉時從事馬元亡出塞瑶追

擊叛羌破之

趙 冲順帝永和六年率兵擊破鞏唐羌詔冲督河西四郡兵諸羌寇武威以冲爲護羌校尉擊破之復追叛羌戰死而前後多斬獲羌由是衰

韓 皓代馬賢爲護羌校尉燒當羌酋犀苦先繫質於令居求歸故地不遣因轉湟中屯田置兩河間以逼羣羌

馬 續茂陵人永建二年爲護羌校尉前校尉韓皓轉湟中屯田置兩河間以逼羣羌恐見圖乃解仇詛盟各自警備續先示恩信移屯田還湟中羌眾乃安至陽嘉三年種羌長封等復寇隴西漢陽續擊敗之

第五訪字仲謀京兆長陵人順帝時遷張掖太守歲饑粟石數千訪卽開倉賑急吏懼愆爭欲上言訪曰若上須報是棄民也太守

甘肅新通志

卷五十五

職官志 大吏傳上

九

樂以一身救百姓遂出穀賦人帝璽書嘉之一郡得全歲餘官民並豐界無盜賊遷南陽去官旋拜護羌校尉邊境服其威信卒於官

种 暠字景伯河南洛陽人桓帝時匈奴寇并涼二州擢暠爲度遼將軍至營宣國威信誠心懷撫羌夷悅服邊方晏然入爲大司農

張 貢以漢陽太守遷爲校尉招離滿狐奴等五萬餘戶降隴右復平

劉 虔靈帝時爲涼州刺史蔡邕上封事其四曰刺史所以督察奸枉分別黑白伏見涼州刺史虔有奉公嫉奸之心餘皆枉撓不稱職

三國漢諸葛亮字孔明瑯琊人仕蜀至丞相兼領司隸校尉建興六

年帥師攻祁山戎陣整齊號令明肅南安天水安定三郡響應關中大震魏命張郃拒之亮使馬謖與郃戰於街亭謖違亮節制爲郃所敗亮拔西縣千餘家還於漢中九年復出祁山敗魏司馬懿於鹵城殺其將張郃

魏夏侯淵字妙才沛國譙人獻帝建安十九年魏王操以淵爲行護軍將軍襲韓遂於顯親收其軍糧追至略陽破之轉擊高平屠各皆散走時枹罕宋建因涼州亂自號平漢王淵進討圍枹罕月餘拔之斬建及所置丞相以下別遣張郃等平河關渡河入小湟中西西諸羌盡降隴右平

韋康字元將魏人太祖時荀彧以康淵才亮節雅度宏毅薦爲涼州刺史孔融與其父書稱爲偉器在郡數年爲馬超圍堅守歷時救軍不至遂見殺

甘肅新通志

卷五十五

職官志 大吏傳上

十

蘇則字文師扶風人少以學行聞初爲酒泉太守徙金城太守時喪亂之後吏民流散則撫循甚謹外招懷羌胡旬月之間流民歸者數千家乃明爲禁令違者輒戮從者必賞親勸民耕歲得豐稔李越以隴西叛率羌胡討降之加護羌校尉賜爵關內侯復以討麴演功進封都亭侯

鍾繇字元常長社人建安初關中諸將馬騰韓遂各擁強兵相爭太祖方有事關東以關右爲憂乃表繇督關中諸軍繇至關中移書騰遂以陳禍福遂各遣子入侍後封定陵侯

郭淮太原人文帝黃初中擢領雍州刺史稱爲神明太和中隴右無穀議欲從關中轉運淮以恩威撫循羌胡家使出穀平其輸調軍食遂足

張既高陵人文帝初置涼州以鄒岐爲刺史盧水胡反帝召岐

以既代之既渡河深入潛軍次武威胡以爲神引還顯美遂進擊大破之又擊破酒泉蘇衡等上疏請治左城築障塞置烽堠以備胡西羌率眾二萬餘落降後西平麴光等殺郡守既檄諭諸羌斬送光首其餘安堵如故既臨二州十餘年政惠著聞其所禮辟皆有名位

陳 泰潁川許昌人嘉平初代郭淮爲刺史拒蜀有功

徐 邈字景山燕國薊人明帝時爲涼州刺史領護羌校尉河右少雨常苦乏穀邈修武威酒泉鹽池以收虜穀又廣開水田募貧民佃之家有餘粟然後立學明訓禁厚葬斷淫祀進善除惡風化大行西域流通羌戎入貢皆邈勳也

李 熹銅鞮人魏末除涼州刺史領護羌校尉綏禦華夷甚有聲績羌虜犯塞不及啟聞輒以便宜深入遂大剋獲以功重免譴時

甘肅新通志

卷五十五

職官志 大吏傳上

十一

人比之漢代馮甘焉

晉司馬駿字子臧歷遷鎮西大將軍使持節都督雍涼等州諸軍事撫御有恩勸督農桑與士卒分役羌虜樹機能叛遣將討之斬三千餘級進位大將軍開府辟召儀同三司尋封扶風王卒百姓爲樹碑見者無不泣拜

杜 預字元凱京兆杜陵人泰始中虜寇隴右以預爲安西軍司更除秦州刺史領東羌校尉輕車將軍假節屬虜兵強盛時石鑿爲安西將軍使預出兵擊之預以虜乘勝馬肥而官軍懸乏宜并力大運須春進討陳五不可四不必鑿大怒復奏預擅飾城門官舍稽乏軍興遣御史檻車徵詣廷尉以預尚主在八議以侯贖論其後隴右之事卒如預策石鑿自軍還論功不實爲預所糾遂相恨 言論喧嘩坐免官

馬 隆字孝興平陸人少而智勇好立名節初涼州刺史楊欣失羌戎心隆策其必敗後果敗沒河西斷絕武帝憂之隆請任其責募三千五百壯士至夷在所依八陣圖作偏廂車且戰且前殺傷無算永熙初封高縣侯授東羌校尉積十餘年威信著於隴右元魏古 弼代郡人少忠謹善騎射太武時爲侍中賜爵建興公鎮長安有威名宋將裴方明克仇池立楊元庶子保熾於是假弼節督隴右諸軍討仇池平之

陸 俟代人太武間以征赫連昌命俟督諸軍轉武牢鎮大將平涼休屠金崖羌狄子玉等叛進安定大將討獲之從征蓋吳功遷內都大官

皮豹子漁陽人少有武略眞君三年宋將裴方明等陷仇池拜豹子使持節仇池鎮將督關中諸軍進討四年至濁水擊擒宋秦州

甘肅新通志

卷五十五

職官志 大吏傳上

十一

刺史胡崇之 池平尋除都督秦雍荆梁益五州諸軍事進號征西大將軍開府仇池鎮將如故諸氏復推楊文德爲主宋因以文德爲武都王守葭蘆城於是武都陰平五郡氏人皆叛應文德豹子討之其將楊高來降文德棄城南走興安中宋將殷孝祖修兩當城於清東詔豹子助天水公封勅文擊之破其瑕邱鎮擢爲內都大官卒贈淮陽王

尉 眷代人世祖時爲安南將軍張掖王禿髮保周反眷破於番禾詔眷留鎮涼州加都督涼沙河三州諸軍事威名歷著

穆 顛代人世祖時爲龍驤將軍忠謹有材力後出鎮涼州有聲績卒贈建安王諡曰康

穆 亮字幼輔代人起家侍御中散尚中山長公主高祖初除使持節秦州刺史在州末期大著聲稱徵爲殿中尚書後除都督秦

梁益三州諸軍事仇池鎮將時岩昌王梁彌機死子彌博爲吐谷
渾所逼來奔仇池亮擊走吐谷渾立彌機兄子彌承而還階陵羌
寇仇池屯陽遐嶺遣副將楊靈珍擊走之境内大安徵爲侍中
拓跋渾陽平王熙子爲涼州領護西校尉清慎慈愛還京師父老
皆涕泣道送若違所親

宇文泰代郡武川人孝昌中平万俟醜奴上首功以直閣將軍行
原州事時關隴寇亂百姓凋殘撫以恩信民皆悅服後爲周太祖
賀若誼河南洛陽人有能名以誘降茹茹累拜車騎將軍封霸城
縣子加開府爲原州總管

梁 熙孝武太昌元年苻秦滅涼以熙爲涼州刺史清儉愛民河
右安之

獨孤信本名如願雲中人徙家武川在魏累有功從孝武帝西遷

甘肅新通志

卷五十五

職官志 大吏傳上

十三

大統六年除隴右十州大都督秦州刺史先是守宰闇弱政令乖
方民有冤訟歷年不能斷決及信在州事無壅滯示以禮教勸以
耕桑數年之中公私富實流民願附者數萬家帝以其信著遐邇
故賜名信岷州刺史梁企定舉兵反詔信討之企定尋爲部下所
殺其子收其餘眾信乃勒兵向萬年至三交口賊并力拒守信因
詭道趨稠松嶺賊不虞信兵至望風奔潰逐北至城下賊并出降
十六年從大軍東討還遷尙書令太祖初啟霸業以隴右形勝委
信鎮之甚爲百姓所懷嘗因獵日暮馳馬歸其帽微側詰旦吏民
咸慕信而側帽焉其爲士庶所重如此後封衛國公

韓 褒字宏業昌黎人資世蔭起家奉朝請大統初爵通侯位侍
中旋除西涼州刺史羌胡之俗輕貧弱重豪富豪富之家侵漁小
民如僕隸故貧者日削富者日益褒乃悉募貧民以充兵士優復

其徭役又調富人財貨以賑給之每西域貨至先盡貧民市之於是貧富漸均戶口殷實十六年加大都督晉公爵卒諡曰貞
賀拔岳字阿斗泥神武尖山人少有大志愛施好士爲大學生善左右騎射勇氣絕人以功累遷光祿大夫武衛將軍討万俟醜奴有功進岳都督涇州刺史封公

趙 貴字元貴天水南安人魏末從賀拔岳平關中爲都督侯莫陳悅害岳貴圖報之首議迎宇文泰悅平泰卽用貴以本將軍持節行秦州事當州大都督爲政清靜民吏懷之魏文帝立梁企定稱亂河右以貴爲隴西行臺討破之

宇文導字菩薩泰兄邵惠公子也從泰西討侯莫陳悅悅敗走導率騎追斬之大統中徵爲隴右大都督秦南等十五州諸軍事秦州刺史導性寬明善於撫御推誠接人吏民愛附恭帝元年卒於

甘肅新通志

卷五十五

職官志 大吏傳上

十四

上邽加尚書令諡曰孝朝議以導撫和羌戎威恩顯著欲令世鎮隴右乃葬於上邽城西無疆原華戎會葬者萬餘人奠祭於路悲號滿野

宇文遵泰兄子泰上表請討侯莫陳悅留遵爲都督鎮原州泰軍出木峽關令遵至牽屯山追悅斬之

王 盟其先樂浪人以父鎮武川家焉万俟醜奴叛從賀拔岳爲先鋒平秦隴拜征西將軍宇文泰將討侯莫陳悅徵盟赴原州以爲留後大都督鎮高平

李 弼字景和遼東襄平人魏時隸侯莫陳悅爲大都督太昌初授清水郡守隨悅征討屢有尅捷及悅害賀拔岳軍停隴上太祖自平涼進軍討悅弼諫悅曰岳旣無罪而公害之又不能撫納其眾使無所歸宇文夏州收而用之得其死力咸云爲主將報讐其

意固不小也今宜解兵謝之不然恐必受禍悅惶惑計無所出會
太祖軍至悅乃棄秦州南出據險以自固翌日弼密通使太祖許
背悅來降夜弼乃勒所部云侯莫陳公欲還秦州汝等何不束裝
弼妻悅之姨也特爲悅所親委眾咸信之人情驚擾爭趨秦州弼
乃先馳據城門以慰輯之遂擁眾以歸太祖悅由此敗太祖謂弼
曰公與吾同心天下不足平也仍令弼以本官鎮原州尋拜秦州
刺史

蔡祐高平人事母以孝聞有膂力便騎射宇文泰在原州召爲
帳下親信屢立大功著光明鐵鎧時人呼爲鐵猛獸授平東將軍
轉原州刺史尋除大都督

周陸騰字顯聖侯孫少慷慨有大節歷總管節度位柱國爵上庸
公建德二年徵拜大司空出爲涇州總管恤軍愛民時論稱之

甘肅新通志

卷五十五

職官志 大吏傳上

十五

達奚震代郡人父武諡桓卒震襲爵鄭國公數戰有奇功累從高
祖東伐進柱國宣政中駐原州總管三州二鎮諸軍事原州刺史
隋段文振北海期原人高祖時爲原河二州刺史遷蘭州總管俱著
政績封隴岡縣公煬帝卽位徵爲兵部尚書從征吐谷渾文振督
兵屯雪山連營三百餘里合圍吐谷渾主於覆袁山以功進右光
祿大夫

元 褒河南洛陽人性友悌家多金悉給諸兄無所受開皇初爲
原州總管有商人失金疑同宿所盜爭訟褒察其冤捨之商人詣
闕訟褒受賂縱賊文帝遣使詰治乃引咎免官盜尋發他所帝謂
褒曰卿何自誣對曰臣受委一州不能息盜罪一百姓爲人所誣
不付法司卽放免罪二牽及愚誠至爲物議罪三臣如不言受賂
恐使者以縲紲橫及良善益重臣罪是以自誣帝歎服稱爲長者

龐 晃榆林人知文帝非常人深自結納嘗與帝射雉以中穀爲他日驗及帝受禪進晃公爵從河間王擊突厥斬首千餘級宿衛十餘年遷原州總管

竇榮定扶風平陵人隋初以與佐命拜上柱國大將軍除秦州總管突厥沙鉢略寇邊以爲行軍元帥率九總管步騎三萬出涼州與虜戰於高越原大挫其鋒突厥請盟而退

柳 彧字幼文河東解州人少好學博涉經史宇文護引爲記後出爲甯州總管開皇間遷治書侍御史百僚敬憚於時刺史多任武將類不稱職彧上表以諫帝善之

崔宏度博陵安平人開皇初突厥入寇宏度以行軍總管出原州拒之御下巖峻所至令行禁止盜賊屏息長安奸民爲之謠曰甯飲三斗醋莫遇崔宏度後檢校原州事仍領行軍總管

甘肅新通志

卷五十五

職官志 大吏傳上

十六

韋 洸字世穆杜陵人性剛毅習弓馬文帝時擊尉遲迴於相州旋突厥寇邊洸出兵原州擊破之卒諡曰敬加上柱國

崔仲方字不齊博陵安平人好讀書有文武材開皇十四年以基州刺史轉會州總管時諸羌猶未賓服詔令擊之諸部悉平賞賚優渥

裴 矩字宏大高祖時爲吏部侍郎大業三年西域諸胡多至酒泉張掖交市帝令矩掌之矩訪諸國山川風俗人物形象服飾撰西域圖記三卷合四十四國奏之後以綏懷之略進位光祿大夫長孫熾字仲光河南洛陽人累官吏部侍郎大理卿以戶部尚書充西南道大使擊吐谷渾破之追至青海而還按是時裴仁基亦以銀青光祿大夫破吐谷渾於張掖加授金紫光祿大夫蓋一事也

劉 權字世略彭城人大業五年從征吐谷渾逐賊至青海帝復令置河源郡積石鎮大開屯田留鎮西境在邊五年諸羌懷附貢賦歲入吐谷渾餘燼遠遁道路無壅徵拜司農卿加金紫光祿大夫

唐柴 紹字嗣昌臨汾人幼趨健有武力以任俠聞高祖卽位以功拜左翊衛大將軍吐谷渾党項寇邊敕紹討之敵據高射紹軍矢雨下眾失色紹安坐遣人彈琵琶使二女子舞敵疑之休射觀紹伺其懈以精騎從後掩擊敵大潰斬首五百級

竇 軌字士則岐州平陵人從義兵平京城武德元年以討稽胡功授太子詹事會赤排羌與薛舉叛將鍾俱仇同寇漢中拜秦州總管與賊連戰皆捷餘黨悉降進封鄜國公

楊恭仁隋觀王雄子性厚以禮自閑未嘗與物忤時方之漢石慶

甘肅新通志

卷五十五

職官志 大吏傳上

十七

武德二年爲涼州總管熟悉邊情勤綏慰葱嶺以東皆奉貢卒贈潭州都督陪葬昭陵諡曰孝

楊 岌爲涇州都統燕王李藝反岌勒兵擊之藝眾潰斬首送長安

李大亮涇陽人貞觀三年爲涼州都督嘗有臺使諷大亮獻佳鷹大亮密表曰陛下絕畋獵久矣而使者求鷹信陛下意耶乃乖昔旨如其擅求是使非其才上手詔褒美賜以荀悅漢紀大亮恭儉忠謹房元齡每稱其有王陵周勃之節

李 靖字藥師三原人貞觀九年督五總管兵伐吐谷渾諸將議春草未芽馬弱不可戰靖決策深入遂踰積石山大破之封衛國公

尉遲恭字敬德朔州華陽人從太宗定天下封鄂國公會突厥入

寇授恭涇州行軍道總管恭令軍士僞胡服雜胡騎中乘間擊斬大破突厥於涇西

杜 暹濮州人貞觀中因按事至突騎施其酋饋之金固辭左右曰寄身異域不宜逆其情乃受之埋於幕下出境移牒令取之虜大驚十二年爲安西都護後封魏縣侯

侯君集三水人貞觀十三年爲交河道大總管將兵擊高昌十四年滅之分兵略地下其郡三縣五城二十三戶八千四十餘口萬七千七百三十馬四千三百匹以其地爲西州置安西都護府留兵以守勒石紀功而還

阿史那社爾貞觀中龜茲王不朝貢與焉耆叛附突厥命社爾爲崑邱道行軍大總管討之凡破大城五俘男女數萬遣使諭降小城七百餘西域震懾乃立王弟葉護高宗時徙安西都護於其國

甘肅新通志

卷五十五

職官志 大吏傳上

十八

統于闐碎葉疏勒號四鎮而以故安西高昌爲西州都督府治郭孝恪許州人任安西都護貞觀十六年西突厥寇伊州孝恪擊敗之時焉耆叛附西突厥相約爲輔車不朝貢乃命孝恪討之傳其城執焉耆王獻京師後以其地爲焉耆都督府

李素立趙州高邑人貞觀二十一年爲燕然都護統瀚海等六府皋蘭等七州素立撫以恩信羌落懷之共率馬牛爲獻素立惟受盃酒餘悉遣之

蘇定方高宗顯慶二年爲前軍總管擊西突厥至曳咥河西敗沙鉢羅兵冒雪兼行至其牙帳縱兵擊之斬獲萬數乃息兵諸各歸所居道路置郵驛掩骸骨問疾苦畫疆場復生業百姓安堵命蕭嗣業將兵追沙鉢羅擒之分其地置崑陵蒙池二都督府

張孝嵩初爲監察御史奉使廓州拔汗那者古烏孫也內附歲久

吐蕃攻之其王奔安西求救孝嵩率旁側戎落出龜茲西數千里下數百城傳檄諸國威振西域大食等八國詣降勒石紀功而還楊 胄顯慶三年爲屯衛大將軍時遣左領軍郎將雷文成送龜茲王布失畢歸國龜茲大將羯獵顛發眾拒之詔胄發兵進討誅之以其地爲龜茲都督府

薛仁貴龍門人顯慶中爲鐵勒道行軍副總管龍朔二年從鄭仁泰擊鐵勒九姓時九姓眾十餘萬令驍騎數十來挑戰仁貴發三矢殪三人虜氣懾皆降軍中歌曰將軍三箭定天山壯士長歌入漢關後拜瓜州長史

鄭仁恭爲涼州都督龍朔二年敗鐵勒於天山明年夏以吐蕃攻吐谷渾詔仁恭爲青海道行軍大總管以救之

婁師德字宗仁原武人上元初爲監察御史會吐蕃盜邊劉審禮

甘肅新通志

卷五十五

職官志 大吏傳上

十九

戰沒師德奉使收敗亡於洮河因使吐蕃其首領論贊婆等自赤嶺操牛酒迎勞師德諭國威信開陳利害番人畏悅後募猛士討吐蕃乃應詔從軍有功遷殿中侍御史兼河源軍司馬與敵戰白水澗八遇八克天授初爲左金吾將軍檢校豐州都督長壽元年復爲河源積石懷遠軍及河蘭鄯廓州營田大使萬歲通天中爲隴右諸軍大使復領營田

裴行儉字守約聞喜人調露二年西突厥都支及吐蕃連和侵逼安西上從行儉計命冊送波斯王歸國過西州揚言須稍涼乃西都支覘知之不設備行儉召四鎮酋長僞約畋得萬人陰勒部伍遂倍道疾進去其部落十餘里使趣召都支都支驚駭無措出迎謁遂擒之俘歸京師上親勞宴曰行儉提孤軍入萬里兵不血刃而叛黨擒可謂文武兼資矣拜禮部尚書兼右衛大將軍永隆中

突厥寇原慶二州復詔行儉爲總管討降之歸封聞喜縣公
黑齒常之百濟西部人驍勇有謀略儀鳳三年擊吐蕃破之擢武
衛將軍副使調露中吐蕃使贊婆等入寇屯良非川常之引精騎
三千夜襲其軍斬首二千級贊婆等單騎去拜河原道經略大使
乃斥地置烽七十所開田五千頃歲收粟斛百餘萬洺軍七年吐
蕃畏憚不敢盜邊封燕國公

郭 翰中宗嗣聖三年以御史巡察隴右多所按劾次甯州時狄
仁傑爲刺史民爭言有異政翰就館以筆紙置於案謂僚屬曰入
其境其政可知願薦使君美於朝卽命駕去

狄仁傑字懷英太原人嗣聖三年以侍御史爲甯州刺史御史郭
翰巡察隴右入甯州境耆老歌刺史德美者盈路翰表薦之徵爲
冬官侍郎五年爲江南巡撫使有籍沒者五千口仁傑密奏彼皆

甘肅新通志

卷五十五

職官志 大吏傳上

二十一

註誤臣欲顯奏似爲逆人申理不言又乖陛下仁卹之旨太后特
原之皆流豐州道過甯父老迎勞之曰我狄使君活汝耶相攜哭
於德政碑下後以反正之功追封梁國公

郭元振名震貴鄉人嗣聖十八年爲涼州都督初州境輪廣僅四
百里吐蕃頻歲奄至城下元振於南峽置和戎城北磧置白亭軍
控制衝要遂拓境千五百里自是州無寇患又令甘州開置屯田
盡水陸之利舊粟麥斛至數千至是一縑糴數十斛軍糧支數十
年元振善撫御在州五年夷夏畏服令行禁止道不拾遺河西諸
郡置生祠豎碑頌德神龍中遷安西大都護突厥款塞願和及召
爲太僕卿安西蕃長及百姓哭送者遍野先天元年爲朔方軍大
總管築豐安定遠城

唐休璟名璿以字行始平人垂拱中爲安西副都護聖歷中授涼

州都督持節隴右諸軍副大使吐蕃率騎數萬寇涼州入洪源谷休璟以兵數千臨高望之見賊旗鎧鮮明謂麾下曰吐蕃自欽陵死贊婆降麴莽布支新將兵欲以示武且其下皆貴臣豪酋子弟騎雖精不習戰吾爲諸軍取之乃披甲先登六戰皆克斬二將獲首二千五百築京觀而還

張仁愿華州下邽人景龍二年以左屯衛大將軍充朔方軍總管擊突厥夜掩其營破之初朔方軍與突厥以河爲界時默啜悉兵西擊突騎施仁愿乘虛取漠南地於河北築三受降城絕突厥南寇路六旬而就又於牛頭朝那山北置烽堠千三百所自是朔方無寇減鎮兵數萬歲省費億計

王孝傑新豐人初與劉審理擊吐蕃皆沒於虜後竟得歸由是知吐蕃虛實會西州都督唐休璟請復取龜茲等四鎮嗣聖九年乃

甘肅新通志

卷五十五

職官志 大吏傳上

一二十一

敕孝傑及阿史那忠節將兵擊破之復取四鎮置安西都護於龜茲發兵三萬戍守之後爲總管與契丹戰死

張守珪開元初以蕭嵩薦擢瓜州都督初爲瓜州刺史其地爲吐蕃所毀守珪帥餘眾築城板幹裁立吐蕃奄至守珪於城上置酒作樂虜疑有備不敢攻守珪縱兵擊之虜敗走乃復修城市收合流散皆復故業遷幽州節度使屢擊契丹敗之

王 峻滄州景城人擢明經屢受節度開元二年吐蕃寇臨洮與薛訥夾擊大破之俘獲無算以功加光祿大夫清源縣男原州總管

薛 訥字慎言絳州龍門人仁貴子開元二年吐蕃寇臨洮至蘭州剽牧馬詔訥攝羽林將軍爲隴右防禦使與王峻擊之追及賊戰武階驛犄角破其眾尾北至洮水又戰長城堡俘斬數萬悉收

所掠及仗械不貲以功拜左羽林大將軍

張 說字道濟洛陽人開元中使說持節撫九姓說從輕騎二十直詣其部慰諭酋豪由是九姓遂安王峻討康待賓詔說相聞經略時党項羌亦連兵攻銀城說將步騎萬人擊破之仍招納党項使復故處奏置麟州以安羌眾十年詔爲朔方節度大使復討康待賓餘黨平之初緣邊戍兵常六十餘萬說以時平無事奏罷二十餘萬還農上以爲疑說曰臣久在疆場具知其情將帥苟以自衛及役使營私而已若禦敵制勝不必在多臣請以闔門百口保之上乃從之

張嘉貞字嘉貞蒲州猗氏人河東採訪使張循憲薦其材擢監察御史累遷中書舍人歷秦州都督爲政嚴肅甚爲吏人所畏後至宰相

甘肅新通志

卷五十五

職官志 大吏傳上

一一二一

杜希望萬年人開元閒拜鄯州都督拔吐蕃新城更號威戎軍碎赤嶺界碑又發鄯州兵奪吐蕃河橋築鹽泉城號鎮西軍威鎮吐蕃時軍事屢興府庫虛寡希望居數歲芻粟金帛豐裕

蕭 嵩開元十四年吐蕃陷瓜州河隴大震帝擇堪任邊者時嵩將赴朔方徙爲河西節度使判涼州事嵩與吐蕃戰祁連城下自辰迄晡賊乃大潰斬一將賊哭震山谷露布至帝大悅授嵩中書門下三品嵩以裴寬爲判官與王君奭判官牛仙客俱掌軍政人心寢安又奏張守珪爲瓜州刺史收合流散復縱反閒於吐蕃國中云大將悉諾邏與中國通謀贊普誅之吐蕃自是少衰

蓋嘉運開元二十七年爲磧西節度使引兵擊突騎施擒其可片骨奴取交河公主悉收散髮之民數萬以與拔汗那王威振西陲捷奏上嘉其功以爲河西隴右節度使

李適之一名昌恆山愍王孫也開元中爲通州刺史以強幹見稱擢拜秦州都督政不苛細人吏便之後至宰相

哥舒翰其先蓋哥舒部之裔能讀左氏春秋漢書仕至左衛郎將吐蕃寇邊與翰遇苦拔海吐蕃枝其軍爲三行從山差池下翰持半段槍迎擊所嚮披靡名蓋軍中擢副隴右節度河源軍使先是吐蕃候積石麥熟歲來取莫能禦翰乃設伏東南谷吐蕃以五千騎入塞將就田翰自城中馳至虜駭走伏起悉殺之隻馬無還者後進涼國公兼河西節度使復攻破吐蕃洪濟大莫門等城收黃河九曲以其地置洮陽郡築神策宛秀二軍進封西平郡王

王忠嗣華州人以武功至金吾衛將軍素勇敢及爲將乃能持重旋爲河西隴右朔方河東節度佩四將印控制萬里每互市高估馬價諸蕃爭以馬來市蕃馬遂少每歲積石麥熟吐蕃輒穫之無

甘肅新通志

卷五十五

職官志 大吏傳上

一二十三

敢禦者忠嗣遣將伏兵於其側夷至突出夾攻之無一人得返由是吐蕃不敢犯

郭子儀華州鄭人天寶十四載安祿山反以子儀爲朔方節度使與李光弼討破史思明復河北十餘郡方北圖范陽會天子入蜀太子卽位靈武詔班師子儀將兵五萬疾赴行在軍威始振詔以爲靈武長史同平章事自是平河曲復兩京破吐蕃服回紇以身繫天下安危者二三十年

李光弼營州柳城人嚴毅沈果有大略天寶六載爲河西兵馬使王忠嗣遇之厚雖宿將莫能比乾元二年代郭子儀爲朔方節度使始至號令一施壁壘旌旗精彩倍增於是破史思明擒安太清敗史朝義所向披靡嘗以短兵置韉中曰戰危事吾國之三公不可死賊手萬一不利諸君死敵我死國不令諸君獨死也其治軍

也指顧號令諸將莫敢仰視議定而後戰能以少制眾與郭子儀齊名

高僊芝本高麗人初從軍安西驍勇善騎射累官四鎮節度副使天寶六年小勃律王及其旁二十餘國皆附吐蕃貢獻不入以僊芝爲行營節度使討之僊芝遣將軍席元慶將千騎前行縛其大臣僊芝繼至斬附吐蕃者數人急遣元慶斷婆夷藤橋虜小勃律王及吐蕃公主而還遷安西四鎮節度使

劉晏字士安曹州南華人八歲獻頌號神童名震一時後拜彭原太守進御史中丞寶應元年爲度支轉運鹽鐵等使時安史之亂天下戶口什亡八九所在宿重兵費不貲皆倚辦於晏晏有精力多機智變通有無曲盡其妙嘗募善走者覘報四方物價不數日皆達食貨輕重之權悉制在掌握國家獲利而天下無甚貴甚

甘肅新通志

卷五十五

職官志 大吏傳上

一二十四

賤之憂又於諸道各置知院官每旬月具雨雪豐歉之狀以告豐則貴糶歉則賤糶或以穀易雜貨供官用轉於豐處賣之知院官始見不稔之端卽行申報預爲籌救不待困弊流殍然後賑之由是戶口蕃息始任轉運使時天下見戶不過二百萬季年乃三百餘萬其初財賦歲入不過四百萬緡季年乃千餘萬緡於民無擾而於國獲大利至錢穀出納悉委之文士嘗曰士陷贓賄則淪棄於時名重於利故士多清修吏雖廉潔終無榮顯利重於名故吏多貪污後爲楊炎所譖殺天下冤之

馬璘扶風人大曆初爲邠甯節度使武幹絕倫惠恤士卒人樂爲用寇不敢犯爲中興銳將以段秀實爲都虞侯多所裨益及卒軍中奔哭者數千人喧咽門屏以功封扶風郡王諡曰武

杜黃裳字遵來京兆萬年人擢進士第郭子儀辟佐朔方府子儀

入朝使主留事李懷光與監軍陰矯詔誅大將等以動眾心欲代子儀黃裳得詔判其非以質懷光懷光服罪於是諸將很驕難制者黃裳皆以子儀令易置眾不敢亂

路嗣恭字懿範京兆人爲子義朔方節度留後大將孫守亮擁重兵驕蹇不受制嗣恭因稱疾守亮至卽殺之一軍皆震時靈武初復諸多蕭索嗣恭披荆棘立軍府威令大行

馮河清京兆人初爲涇原兵馬使數與吐蕃戰有功名聞軍中姚令言犯闕德宗幸奉天河清甫聞與領州事姚况召諸將計事東向哭勵以忠義卽發儲鎧仗百乘獻行在所初帝之出六軍倉卒無良兵及河清輸械至披堅執銳軍聲大振朱泚數遣謀招之輒斬以徇拜河清涇原節度使安定郡王况爲行軍司馬

杜希全朔方節度使軍令嚴整人畏其威奉天之狩引兵赴難賊

甘肅新通志

卷五十五

職官志 大吏傳上

一二十五

平遷靈鹽豐夏節度使

郭 昕子儀子爲四鎮留後舊安西節度使撫甯西域統龜茲于闐焉耆疏勒四國故謂之四鎮自吐蕃陷河隴伊西昕帥將士閉境拒守數遣使奉表皆不達德宗建中二年昕遣使問道自回紇中來上嘉之賜爵武威郡王

李元忠建中二年爲伊西北庭節度使遣使詣闕上嘉之賜爵甯塞郡王

韓 譚貞元三年吐蕃戍西夏者饋運不繼人多病疫思歸尙結贊遣三千騎逆之悉焚其廬舍毀其城垣驅其人民而去於是割振武綏銀二州以潭爲節度使鎮夏州敵不敢犯

李 觀洛陽人貞元時擢涇原節度使在屯四年訓部伍儲藏饒衍

范希朝字致君河中虞鄉人初從邠甯軍爲別將事韓游瓌以功累兼御史中丞瓌畏其才將伺隙殺之希朝奔鳳翔貞元四年詔以希朝代游瓌希朝曰始逼而來終代其任非所以安反仄也軍中脅監軍使請詔拜甯州刺史邠甯節度副使

劉昌開封人善騎射貞元中拜涇原節度使城平涼開地二百里扼彈箏峽又西築保定扞青石嶺凡七城二堡旬日而就在邊十五年率士卒墾田軍有羨食邊陲安謐憫將士骸骨暴露悉瘞之夜夢有詣昌謝者昌具以聞上命建二冢將曰旌義士曰懷忠葬淺水原昌率諸將祭之邊兵莫不感泣

高崇文字崇文幽州人性樸重寡言貞元中吐蕃三萬寇甯州崇文率兵三千往救戰佛堂原大破之詔同中書門下平章事劉闢反於蜀以杜黃裳薦率軍入川一戰擒之及餘黨悉平謂監軍曰

甘肅新通志

卷五十五

職官志 大吏傳上

一二十六

西川乃宰相回翔之地豈敢自安上表求効死邊陲乃以爲邠甯節度使子承簡亦積功拜右金吾衛大將軍復節度邠甯屯甯州以制虜卒莫敢侵

郝玘貞元中鎮臨涇善戰屢破吐蕃以臨涇洛口地沃衍宜畜牧獻策於節度段佑佑嘉之元和三年詔城臨涇行原州刺史重防戍也在邊三十年吐蕃大畏嘗稱其名以怖唬兒嗣封保定郡王

柳公綽字孝寬陝西華原人初爲鄂岳觀察使詔以兵五千授安州刺史李聽討吳元濟公綽曰朝廷以吾書生不知兵耶奏請自行許之旣至號令整肅勤恤士卒所乘馬蹠殺圉人殺馬以祭之由是將士感奮故每戰皆捷授邠甯節度使性寬而肅動必以禮弟公權子仲郢爲時顯宦皆恪遵其訓其孝悌禮法爲海內士夫

所宗仰

朱忠亮字仁輔汴州浚儀人憲宗時爲涇原四鎮節度使綜覈軍籍得竄名者三千人吏白老卒不任戰可罷之亮曰古於老馬不棄况戰士乎聞者感奮又涇多賣子者忠亮以財贖前後數百人劉知俊沈重有謀爲彰義節度使鎮涇州勇敢善戰羌人畏服楊元卿穆宗時擢涇原渭節度使墾發屯田五千頃屯築高垣牢鍵閉寇至耕者保垣以守居六年邊人德之

史憲忠建康人會昌中築三原城吐蕃因數犯邊拜憲忠涇原節度使吐蕃遣使來請墮城且願以嘗殺使者之人置塞上憲忠使謝曰前吾未城爾犯吾地安得禁吾城爾知殺吾使爲負宜先取罪人謝我今與爾約前節度使事一置之吐蕃情得而服憲忠疏請於涇積緡錢十萬粟百萬斛戍人宜之

甘肅新通志

卷五十五

職官志 大吏傳上

一二十七

李 福大中五年春上頗知党項之反由邊帥利其羊馬數欺奪誅殺之乃以福爲夏綏節度使自是繼選儒臣以代邊帥之貪暴者党項遂安

周 寶字上珪盧龍人爲涇原節度使選士厲兵屯田力農積粟二十萬斛時號良將

盧簡求河中蒲人大中九年党項擾邊拜涇原渭武節度使簡求居邊善綏御人皆安之

李 聽徙靈鹽節度使部有光祿渠久廢聽始復屯田以省轉饟卽引渠溉塞下地千頃後賴其利

裴 識字通理度子聞喜人襲晉國公爵爲涇原節度使整戎開屯立更戍法戍人親年七十以上者歸養將士悅服加檢校刑部尙書徙靈武等軍節度使靈武地斥鹵無井識誓神而鑿之果得

泉

畢 誠字存之爲邠甯節度使畏懷羌人向時戍兵苦調遣饋饟亦多乏絕誠募土置屯田歲收穀三十萬斛以省度支經費詔書嘉之後崇祀名宦

五代張希崇字德峯幽州薊人唐靈武節度使靈州地接戎狄戍兵饑道常苦抄掠希崇開屯田教耕種軍以足食而省轉運又能招輯戎落自回鶻瓜沙皆遣使入貢

王思同幽州人善騎射好學喜爲詩唐明宗時以匡國軍節度使徙鎮雄武是時吐蕃數爲寇而秦州無亭障思同列四十餘柵以禦之居五年來朝明宗問以邊事思同指畫山川陳其利害思同去明宗顧左右曰人言思同不管事能若是耶於是始知其材以爲右武衛上將軍西京留守後死節

甘肅新通志

卷五十五

職官志 大吏傳上

一二十八

馮 暉魏州人晉靈武節度使靈武自唐明宗後市馬糴粟給賜軍士轉輸供給民不堪役氏羌剽掠商旅多阻暉推恩信部族懷惠止息侵奪然後廣屯田省轉饟治倉庫亭館千餘區多出俸錢民不加賦管内大治

焦繼勳字成績許州長社人少讀書有大志晉少帝時爲宣徽南院使西人寇邊朝議發師致討繼勳抗疏請行拜秦州觀察使兼諸蕃水陸轉運使旣至推恩信設方略招誘諸部酋長相率乞盟邊境以安

楊廷璋字温玉真定人爲河陽巡檢知州事周太祖卽位涇帥史懿稱疾不朝命廷璋往代之且密戒曰懿懷異卽圖之廷璋至屏人出詔書諭以禍福懿感悟卽受代涇原安輯

王 景萊州掖人晉漢時厯官至橫海軍節度周初移鎮鳳翔世

宗卽位加兼中書令先是秦鳳陷蜀州旁蕃漢戶詣闕請收復世宗命景與向拱率兵出大散關進討連陷砦柵遂命景爲西面行營都部署大破蜀軍於上邽斬首數萬級是秋秦州降逾年徙景鎮秦州兼西面緣邊都部署

宋董遵誨涿州范陽人任靈州路巡檢豁達多方略在懷遠軍凡十四年安撫一面夏人悅服嘗有剽掠靈武進奉使兵器者將佐欲討之夏人懼其威盡歸所掠拜伏請罪各謹疆圻秋毫無犯

許均開封人端拱初補指揮使從石普擊賊於原州牛欄砦俘獲甚眾上其功咸平中知鎮戎軍

范廷召冀州棗強人淳化二年任環慶路都部署至道中副李繼隆討李繼遷廷召出延州與賊遇白池大小數十戰屢克捷眞宗嘉之

甘肅新通志

卷五十五

職官志 大吏傳上

二十九

王昭遠冀州人至道中李繼遷擾西鄙絕靈武糧道命昭遠爲靈州路都部署護二十五州芻粟竟達靈武繼遷不敢犯

李繼隆字霸圖上黨人至道二年爲靈環十州都部署初饋饗靈州必由旱海踰冬及春芻粟始集繼隆排眾議堅請徑古原州蔚茹河路太宗許之遂帥師進壁古原州令胡守澄城之是謂鎮戎軍

陳興澶州衛人咸平三年知鎮戎軍上言鎮戎軍南去渭州瓦亭砦七十餘里中有二堡請留兵三百人戍之遂與曹瑋秦翰等領兵抵鎮戎西北掩擊擒斬甚眾詔賜有加

李繼和字周叔常從兄繼隆征伐繼隆請城鎮戎尋棄之咸平中繼和再請遂命知鎮戎軍兼渭原等處巡檢使復築之時繼遷桀驁命張齊賢梁灝經略因訪於繼和繼和上言邊事甚悉皆關至

計五年率兵破衛埋族於麻川自是隴外諸族皆懼乃請移涇原部署於鎮戎爲環延應援夏人伺閒來攻大破之繼和習武好方略涉書史多機警秉性剛嚴部兵終日環甲如寇至故軍多戒備賊不敢犯

張齊賢字師亮曹州人李繼遷陷清遠軍命齊賢爲涇原等州軍安撫經略使齊賢上言清遠軍陷沒以來靈武一郡援隔勢孤此繼遷所覬覦而必至者也以事勢言之加討則不足防遏則有餘能以官爵恩信結蕃部大族首領素與繼遷有隙者使相攻奪我乘弊而擊之則賊可滅也時不能用靈州果陷後繼遷復入寇齊賢部分諸將卻之邊陲遂甯西人懷之

劉綜字居正虞鄉人咸平中夏人擾西邊環慶大屯士馬詔以綜爲陝西轉運副使時靈州孤危獻言者請棄之綜力上言靈州

甘肅新通志

卷五十五

職官志 大吏傳上

三十

民純土沃爲邊陲巨屏所宜固守以爲扞蔽然後於浦洛河建軍築城屯兵積糧爲之應援此暫勞永逸之勢也且鎮遠軍與靈州相接若棄之則原渭等州益須設備較其勞費十倍其利害昭然可驗矣詔從其請

柴禹錫字元圭大名人爲鎮戎軍節度使知涇州入謝上謂曰今委卿旌節兼之重鎮可謂優異矣禹錫感激流涕旣之任寬厚愛民凡土產諸物循歲貢不入私橐

田紹斌汾州人眞宗初調環慶靈州清遠軍部署慶州有野雞族數爲寇掠道路患之紹斌召其酋率三人斷臂馘劓放還寇畏帖服

王凱并州太原人中書令全斌曾孫也眞宗時歷與夏人戰有功由涇州觀察徙秦鳳路入辭帝喻以唃氏木征交易阻絕頗有

入寇之萌宜安靜以處之凱至與主帥以恩信撫接遂復常貢
曹 瑋字寶臣眞定靈壽人彬第三子也年十九知渭州沈勇嚴
明舉措如宿將以破賊功及築籠竿城知秦州兼涇原義渭鎮戎
安撫使時唃廝羅強盛謀內寇瑋陰結其將廝敦敦感激求自效
斬廝羅舅賞樣丹送 首并獻南市地旣唃廝羅大入寇瑋迎戰
三都谷斬首千餘級獲馬牛兵仗三萬餘遷康州防禦使秦人請
刻石紀功特紹褒之天禧中以瑋爲環慶緣邊巡檢安撫使諸夷
聞之歸附者甚眾

王博文字仲明曹州濟陰人進士及第仁宗朝以樞密直學士知
秦州初沿邊軍民之逃者必爲熟戶畜牧又或以遺遠羌易羊馬
故常沒者數百人其禽生羌則以錦袍銀帶茶絹賞之閒有自歸
而中道爲夏人所得亦不能辨坐法皆斬博文乃遣習知邊事者

甘肅新通志

卷五十五

職官志 大吏傳上

三十一

密持信紙往招至則悉貸其罪由是歲減殊死甚眾朝廷下其法
旁路又言河西回鶻多緣互市家秦隴閒請悉遣出境戒守臣使
譏察之

明 鎬安邱人元昊寇延州起爲陝西轉運使敵破金明砦旣去
謀修復其城帥臣擁兵不卽進鎬以百餘騎身督將士一月築成
精選三百餘人教以強弩奏爲清邊軍號最驍悍其後陝西河南
頗仿置之

曹 琮字寶章彬之子初知秦州兼涇原路兵馬定國軍節度觀
察留後琮欲誘吐蕃掎角圖賊得西川舊賈使諭意而沙州鎮王
子遣使奉書願率首領爲朝廷擊賊帝善琮策改陝西副都總管
經略安撫招討副使拜步軍副都指揮使旋以疾卒帝臨奠諡忠
恪琮小心謹畏善贊謀御軍整嚴死時家無餘貲

王仲寶字器之高密人天聖初知鎮戎軍有戰功爲涇原路總管安撫副使與西羌戰於六盤山浮馘數百人會任福於好水川戰沒別將朱觀被圍仲寶援之得全軍出以功徙環慶路總管夏竦字子喬德安人進士及第仁宗寶元初爲忠武軍節度使鎮涇州後爲陝西經略范仲淹爲之副整飭戎務屢挫夏師韓琦字稚圭相州安陽人趙元昊反命琦爲陝西安撫使進樞密直學士陳攻守二策言元昊傾國人寇不過四五萬人我兵分則力弱若併出一道乘賊驕情破之必矣乃詔鄜延涇原同出征旣還營敵使來求盟琦曰無約而請和者謀也命將戒嚴敵果犯山外尋爲經略安撫招討使屯涇州又請立鄜延渭三軍視敵所不備互出擣之以規取橫山元昊懼稱臣時謠曰軍中有一韓西賊聞之心膽寒與范仲淹名重一時朝廷倚以爲重

甘肅新通志

卷五十五

職官志 大吏傳上

三十一

范仲淹字希文吳縣人元昊反副夏竦爲陝西經略大閱州兵得萬八千人分爲六各將三千分部教之量敵寡使出禦敵敵不敢犯相戒曰小范老子胸中有數萬甲兵不比大范老子於是屯兵營田爲持久計修承平永平等砦招流亡廣積儲通斥堠沿邊之民相踵歸業遷環慶路經略安撫緣邊招討使慶西北馬鋪砦爲敵要衝仲淹欲城之密遣子純佑與蕃將先據其地已引兵隨之旣至始發令版築皆具旬日而城成卽大順城也時謠曰軍中有一范西人聞之驚破膽仲淹號令明白愛撫士卒諸羌來者推心接之故敵亦不輒犯其境元昊請和詔拜樞密副使邠慶二州之民與屬羌皆畫像立生祠祀之及其卒也羌酋數百人哭之如父

王堯臣字伯庸應天虞城人陝西用兵爲體量安撫使將行請曰

關中之民凋敝已甚請以詔勞來仍諭以賦平蠲租賦二年仁宗從之還上言陝西兵二十萬分屯四路然可使戰者止十萬敵眾入寇常數倍官軍此所以敗涇原近敵最當要害請益團士兵以三萬屯渭州爲鎮戎山外之援萬人屯涇州爲原渭聲勢二萬屯環慶萬人屯秦州以制其衝突又言前我軍之敗皆由敵先據勝地誘我將帥不能據險擊歸多倍道趨利遂致掩覆願敕邊吏度遠近營砦量敵奮擊毋輕出時韓琦徙秦州范仲淹降耀州堯臣言二人皆忠義智勇不當置之散地又薦种世衡狄青有將帥才上皆納之

狄 青字漢臣汾州西河人善騎射趙元昊反招擇衛士從邊以青爲延州指使青行常爲先鋒凡四年大小二十五戰嘗戰安遠被創甚聞寇至卽挺起馳赴眾爭前爲用臨敵被髮帶銅面具出

甘肅新通志

卷五十五

職官志 大吏傳上

三十三

入賊中皆披靡莫敢當尹洙爲經略判官青以指使見洙與談兵善之薦於經略使韓琦范仲淹曰此良將材也二人一見奇之待遇甚厚仲淹授以左氏春秋青折節讀書悉通秦漢以來將帥兵法由是益知名以功累遷西上閤門副使擢秦州刺史涇原路副都總管經略招討副使

安 俊字智周太原人仁宗時爲環州都監破趙元昊吃吼井那諸砦安撫使韓琦上其功遷環慶路都監俊久在邊羌人識之种世衡得俘虜問曰若屬孰畏乎曰畏安太保

杜 杞字偉長以父鎬蔭强敏有才通陰陽術數之學仁宗時知慶州會白崖山蠻襲破環州杞勒兵破之焚其積聚遂復環州拜環慶路安撫使蕃酋孟香率千騎内附中外信服祀名宦祠
楊文廣祖業父延昭均戰沒范仲淹宣撫陝西與語奇其才置麾

下英宗以爲名將裔旦善戰累官秦鳳副都總管韓琦使築筆策城有奇功詔賜裘馬知鎮戎軍遷都總管都虞侯折可適關中人少時驍勇郭達見之曰眞將種也以功遷皇城使知鎮戎軍羌夏入寇可適深知敵情僞稱夏酋視軍盡斬守候者因潛師疾趨先破之於尾丁磴結陣以待而分騎據西山日使夏不得躡吾後夾攻也夏果來攻可適以部兵三千轉戰至高嶺西從間道截其歸路焚其輜重夏人畏之

景泰字周卿普州進士初知原州元昊亂犯劉璠堡及彭陽城葛懷敏等戰敗泰率兵五千間道赴援先鋒張迴逗留泰斬之遇敵彭陽西裨將夏侯觀欲卻守彭陽泰弗許乃以三百騎分左右翼爲疑兵而以精兵搜山斬敵千餘遷西上閣門使知鎮戎軍劉兼濟善騎射擢兵馬都監破夏兵於黑松林屬其兄平戰沒三

甘肅新通志

卷五十五

職官志 大吏傳上

三十四

川特授內殿崇班知原州固辭仁宗戒曰國恥家仇未報不可不力也屬戶明珠族叛諸將欲亟討兼濟惟日縱飲擊鞠以疑之叛者自潰乃襲殺其酋長收其眾知鎮戎軍

張綸字公信汝陰人仁恕有才略知鎮戎軍

俞獻卿歙人仁宗時除陝西轉運使時邊吏遇事邀功涇原路鈐轄擅於武英州鑿邊壕置堡砦獻卿度必招寇患亟檄罷之未幾賊果至殺將士塞所鑿壕而去

趙滋開封人仁宗時爲涇原義渭鎮戎軍都巡檢會渭州得勝砦主姚貴劫宣武神騎卒千餘人攻羊牧隆城滋馳至諭降者八百餘人貴窮走出砦招討使令滋給賜降卒及遷補將吏滋以爲如是是誘其爲亂藏其牒不用范仲淹韓琦舉滋可將領鎮戎軍西路都巡檢

王 沿館陶人仁宗時爲涇原路經略安撫招討使改涇州觀察使元昊入寇副都總管葛懷敏率兵據瓦亭待之懷敏進兵鎮戎沿以書戒勿入第背城爲砦以羸師誘賊賊至發伏擊之可有功懷敏不聽進至定川果敗賊乘勝犯渭州沿率州人乘城多張旗幟爲疑兵賊遂引去

張方平字安道南京人仁宗時以工部尚書帥秦州謀告夏人將壓境方平料簡士馬聲言出塞已而寇不至言者論其輕舉曾公亮曰兵不出塞何言輕舉寇之不至有備故也倘罪之後之邊臣將不敢爲先事之防矣方平不自安請知南京

鄭 戩字天休吳縣人爲陝西四路都巡管駐涇州初靖遠砦主劉滬謀築水洛章川等城以通秦渭援兵招生羌大王族爲邊衛戩使著作郎董士廉督其役會戩罷尹洙以爲不便請罷役戩爭

甘肅新通志

卷五十五

職官志 大吏傳上

三十五

於朝卒城之

范 祥字晉公三水人通判鎮戎軍元昊圍城急祥力拒卻之累遷度支員外郎權轉運副使建議變鹽法及築古渭城鹽法行之十年歲減權貸務使緡錢數百萬熙甯中以古渭爲通遠軍攻守有資遂復洮隴古地祥卒權陝西轉運副使張說言其功詔贈祕書錄一子未官者

李 參字清臣鄆州須城人歷知興元府陝西轉運使部多戍兵苦食少審訂其闕令民自隱度麥粟之贏先貸以錢俟穀熟還之官經數年廩有羨糧朝廷患邊費益廣參建議輦錢邊郡以平估糴權罷入中法比其去省糧權貸錢千萬計召爲鹽鐵副使

王 素字仲義太尉旦季子初知渭州原州蔣偕建議築大蟲巉堡素遣卒助城之治平初夏人犯靜邊砦復以端明殿學士出鎮

涇原藩夷故老皆歡迎夏人解去拓渭西南城濬湟三周積粟支十年屬羌納地悉增募弓箭手其行陣出入之法身自督訓爲築八堡居之聽散耕田聞警則聚士氣感奮

孫 永字曼叔趙人歷河北陝西都轉運使時邊用不足以解鹽市馬別爲一司外臺不得與永奏曰鹽馬國之大計使主者專其柄旣無以統隸苟爲非法孰從而制之加龍圖閣直學士

范純仁字堯夫仲淹次子歷陝西轉運副使召還神宗問陝西城郭甲兵糧儲如何對曰城郭粗全甲兵粗修糧儲粗備神宗愕然曰卿之才朕所倚信何爲皆言粗對曰粗者未精之辭如是足矣願陛下且無留意邊功若邊臣觀望將爲他日意外之患拜兵部員外郎加直龍圖閣知慶州過闕入對神宗曰卿父在慶著威名今可謂世職卿隨父旣久兵法必精邊事必熟純仁揣神宗有功

甘肅新通志

卷五十五

職官志 大吏傳上

二十六

名心卽對曰臣儒家子未嘗學兵先臣守邊時臣尙幼不復記憶且今日事勢宜有不同陛下使臣繕治城壘愛養百姓不敢辭若開拓侵攘願別謀帥臣神宗曰卿之才何所不能顧不肯爲朕悉爾遂行秦中方饑擅發常平粟賑貸僚屬請奏而須報純仁曰報至無及矣吾當獨任其責或謗其所全活不實詔遣使按視會秋大稔民謹曰公實活我忍累公耶晝夜爭輸還之使者至已無所負

張 凝無埭人任環慶都部署兼安撫使時斥堠數擾凝斬獲甚眾又降岑勣等三十二族麻謀等二十一族邊境得甯

王 韶字子純江州德安人旣第進士洩官後以試制科不中客遊陝西採訪邊事熙甯初詣闕上平戎三策切中時勢帝異其言擢西河經略安撫使大破羌眾復剽吐蕃瞎征降之隨收撫洮岷

疊宕等州進觀文殿學士禮部尚書

章 棗字質夫浦城人初知渭州上言葫蘆河川形勢宜城以備夏時夏方營石門峽棗備熙河環慶四路師出葫蘆河川築二城於石門峽取山川之險上賜名平夏又築西安城方興工夏人以眾來乘棗迎擊敗之及爲經略使克復會州立邊功爲西方最李 憲字子範祥符人神宗初與王韶進取河州遂爲熙河經略安撫司幹當公事元豐中五路出師討夏憲領熙秦軍至西市新城復蘭州城之請建爲帥府進景福殿使仍兼秦鳳軍馬高遵裕字公綽瓊孫熙甯初朝廷用王韶復洮隴遵裕副之尋知通遠軍進兵野人關羌人旅拒引親兵一鼓破之營武勝城下羌眾遁遂據之詔建爲鎮洮軍命知軍事尋以熙河洮岷通遠爲一路

甘肅新通志

卷五十五

職官志 大吏傳上

三十七

游師雄字景叔京兆武功進士元祐初爲軍器監丞夏人攻蘭州之質孤勝如堡師雄言蘭州距賊一舍至通遠不百里非有重山複嶺之阻宜自蘭州李諾平東抵通遠於定西通渭之間建女遮納迷結珠三柵及護耕七堡以固藩籬詔從之遷陝西轉運使王 厚字處道韶子紹聖中幹當熙河公事會瞎征隴 爭國河州守將王瞻與厚同獻議復故地元符元年師出塞下邈州降瞎征等遂定湟鄯又命厚安撫洮西進熙河經略安撫使种師道字彝叔洛陽人少從張載遊有遠識嫻於將略累官涇原都鈐轄旋知懷遠軍夏人侵定邊築佛口峽禦之夏國遣焦彥堅求畫界必欲得故地師道曰若求故地當以漢唐爲正則君家疆土益蹙矣彥堅無以對天下論將材者稱爲老种

劉 鞅字仲偃崇安人登第尉豐城遷龍城令調狄道令旋爲河

湟轉運使河湟兵屯多食不繼給致酋長出金帛易粟以饜軍公私使之繼攝帥鄜延夏人攻震武出奇兵擣之解其圍夏人請納款謝罪給曰朝廷方事討伐吾爲汝請命毋若異時邀歲幣軼疆場以取威怒夏人聽命後入覲會金兵圍京城遣使金營不屈死給爲人莊重寬厚與人交謙恭若有所畏至臨大事則毅然不可奪爲政愛民求民瘼如去已疾故所到處民咸懷之

毛 漸江州人爲陝西轉運使攝帥涇原日夜治兵夏人犯邊遣將擣其虛遂破沒煙砦

張 浚字德遠綿竹人高宗時爲川陝宣撫處置使時金人已取鄜延驍將婁宿孛堇引大兵渡渭攻永興諸將莫肯先援浚至卽出行關陝訪問風俗罷斥姦賊搜攬豪傑諸將惕息聽命時敵帥在淮西浚懼擾東南謀牽制之遂決策治兵合五路師以復永興

甘肅新通志

卷五十五

職官志 大吏傳上

三十八

敵大恐急調師入援大戰於富平涇原帥劉錡身率士卒薄敵陣斬獲頗眾會環帥趙哲擅離所部諸軍皆潰浚斬哲以徇退保興元命吳玠扼和尚原玠與弟璘大破金師敵由是不敢犯蜀且以形勢牽制東南江淮亦賴以安進封魏公

趙 鼎字元鎮聞喜人紹興四年拜參知政事尋加樞密院事都督川陝諸軍事立志遠大力圖匡復爲中興名相第一

李允則字垂範少以材略聞爲甯州防禦使不事威嚴間或步出遇民延坐與語以是洞知人情訟至無大小面訊立斷善撫畜士卒皆得其用盜發輒獲人莫知所由身無兼衣食無重饜不畜貲財後人仰慕作六君子堂允則其一也

強 霓自金歸宋爲武功大夫知環州環慶路統制軍馬兼沿邊安撫使隆興間金兵圍環與其弟環慶路統領震堅守孤城招降

不屈城陷死之詔立旌忠廟

胡世將字承公晉陵人宿曾孫也歷官至安撫制置使吳玠以軍無糧奏請踵至而蜀之饟運遡嘉陵江千餘里半年始達世將始用轉般摺運法軍儲稍充公私便之金陷長安聲援幾絕世將遣吳璘等歸河池遂有石壁之捷金人不敢度隴詔除端明殿學士金李師雄字伯威雁門人皇統二年爲武勝軍節度使正隆末爲河州防禦使宋將吳璘軍至臨洮州人乘城拒守謀欲出降師雄時以事就遠路過州出擊之射宋將權義擒之宋師乃退徒單合喜上京速蘇海水人皇統二年出爲臨洮尹是時關陝以西初去兵革百姓多失業合喜守之以靜民多還歸者大定二年爲陝西路統軍使

喀爾庫守中咸平人大安二年遷通遠軍節度使至甯末移彰德

甘肅新通志

卷五十五

職官志 大吏傳上

三十九

軍未行夏兵數萬入鞏州守中乘城備守兵少不能支城陷吏盡降守中獨不屈夏人壯之且誘且脅守中益堅遂載而西至平涼要以招降府人守中佯許至城下卽大呼曰外兵矢盡且遁矣慎勿降夏人交刃殺之

按喀爾庫守中舊作夾谷守中

盧庸豐潤人至甯元年爲陝西按察使夏人犯邊繕治平涼城池積芻粟團結士兵爲備夏人掠鎮戎陷涇邠遂圍平涼庸矢盡募人取夏兵射城堞箭以濟急用出府庫賞有功者人樂爲死平涼賴以完貞祐二年詔賞功進官四階遷按察轉運使

石盞女魯歡興定三年行平涼元帥府事上言鎮戎赤溝川爲夏人往來要衝我城鎮戎彼必來撓若徵兵旁郡聲言防護示進取之勢以掣其肘臣率平涼兵由鎮戎攻其腹心彼自救不暇我城鎮戎彼必不敢來犯又言鎮戎土壤肥沃且平行臣裨將所統入

千人若授以荒田使耕且戰可禦備一方縣官省費而軍食亦足矣金主嘉納之

烏庫哩長壽興定中爲通遠軍節度使夏人攻定西時弟世顯已降夏夏人執世顯至定西城下謂長壽曰若不速降卽殺汝弟長壽不顧奮戰夏兵退世顯旣降二子當緣坐宣宗嘉長壽功釋之未幾夏人復至攻甚急長壽乘城拒戰矢石如雨夏兵死者數千

乃解去

烏庫哩長壽舊作烏古論長壽

愛 申史逸氏族興定中兵馬都總管任定西州刺史有惠政後爲德順節度使正大四年元兵西來將攻德順有進士馬肩龍客遊鳳翔申器之招與共事鳳帥以德順決不可守勸勿徃肩龍曰吾未識愛申乃知我士爲知己者死耳冒圍入德順申假肩龍判官括民兵九千以守二旬餘城破俱死之金主詔立褒忠祠合祀

甘肅新通志

卷五十五

職官志 大吏傳上

四十

焉

元耶律楚材字晉卿遼之後生三歲孤母教之學及長博極羣書從元太祖伐西域滅數國進至印度鐵門關侍衛見一獸鹿形馬尾綠色而獨角爲人言語之曰汝主宜早還元主以問楚材對曰此名角端解四夷語是上天惡殺之象遣之以告陛下願承天心宥此數國民命元主卽日班師從下靈武諸將爭掠子女財帛楚材獨收遺書及大黃兩駝旣軍士疾疫全活甚眾

廉希憲字善甫布魯海畏吾人世祖初分漢地爲十道併京兆四川爲一以希憲爲宣撫使宣布詔旨安諭六盤捕太平亂黨渾都海反命汪惟良將秦鞏諸軍進六盤惟良辭未得旨希憲卽解所佩虎符銀印授之又發蜀卒令人春將之會有詔赦至希憲命絞太平等於獄方出迎詔人心遂安帝深善之別賜金虎符使節制

諸軍時獲渾都海黨五十餘人希憲悉寬釋使隸入春其黨大喜咸願効力遂得精騎數千詔以希憲爲中書右丞行春蜀省事渾都海西渡河趨甘州阿藍答兒復自和林提兵與之合諸將失利河右大震朝議欲棄兩川退守興元希憲力言不可會親王合丹及汪惟良入春等合兵復戰於西涼大敗之斬俘略盡二叛首俱伏辜事聞帝大嘉之日希憲眞男子進拜平章政事

商 挺字孟卿濟陰人佐楊惟忠宣撫關中時兵火之餘民不聊生挺爲之進賢良除貪暴明尊卑出淹滯定規程止簿責印楮幣頒俸祿務農薄稅期月而民安世祖卽位以廉希憲及挺宣撫陝蜀破渾都海等於甘州帝大悅稱古良將進參知政事

趙 炳字彥明惠州灤城人以戰功屢遷至京兆路總管中統十四年加鎮國上將軍時安西王相王冬居京兆夏避暑六盤歲以

甘肅新通志

卷五十五

職官志 大吏傳上

四十一

爲常會王北伐六盤守兵構亂炳自京兆率兵討平之十五年春六盤兵再亂復討平之十六年王薨入朝帝勞之曰關中事重勞卿因詢民瘼炳具以對

張文謙字仲謙邢州沙河人至元元年以中書右丞行省西夏中興等路羌俗素鄙野事無統紀文謙得蜀士陷於俘虜者五六人使習吏事旬月間簿書有品式子弟亦知讀書俗爲一變濬唐來漢延二渠溉田十數萬頃人蒙其利後拜樞密副使

崔 彧字文卿宏州人負才氣剛直敢言在朝多所建白至元中爲甘肅行省右丞時政不使者皆奏罷之後追封鄭國公

袁 裕字仲寬洛陽人至元中爲甘州等路宣撫副使兼西夏中興等路勸農使時徙鄂民萬餘於甯夏多流離顛沛裕奏請給地立屯官民以安

巴 圖蒙古人延祐元年拜甘肅行省平章政事時米價騰涌陸
挽每石費二百緡巴圖爲經畫計所省至四百餘萬緡自是諸倉
俱充溢甘州氣寒地瘠少稔歲民饑則發粟賑之春闕種則貸之
於是兵饟既足民食亦給詔賜甲冑弓矢及鈔五千緡以勞焉按巴

圖舊作伯都
蒙古作忙兀

蓋 苗字耘夫大名元城人延祐中進士性無所阿而子諒愛人
由參知政事左遷甘肅行省右丞上言甘肅每歲中糧姦弊百端
請以糧鈔兼給則軍民咸利矣上從之尋遷陝西行臺

鼎滿台穆呼哩五世孫至治三年拜甘肅行省平章政事佩金虎
符甘肅歲糴糧於蘭州多至三萬石距甯夏千餘里自甘州又千
餘里始達額齊納路而甯夏距額齊納僅千里鼎滿台令輓者自
甯夏徑趨額齊納歲省費六十萬緡

甘肅新通志

卷五十五

職官志 大吏傳上

四十二

何不罕爲慶陽路兵馬都總管訓練士卒督課農桑政通人和百
廢俱興

博羅歡十大功臣畏兀兒之後也至元十八年以中書右丞行省
甘肅知勇忠義出於性成累官上柱國封奉安王在甘威惠大著
邊人安之

韓 鏞字伯高濟南人骨鯁有聲至正間爲甘肅行省參知政事
清介廉明政績炳著

陳祖仁字子山汴人由進士第一人及第至正二十四年爲侍御
史劾宦者朴不花等忤皇太子左遷甘肅參政時天極寒衣單甚
以弱女託其友卽日就道後歷太常禮義院使元末城破殉節

